

嘉業堂
叢書

張說之文集

第三册

張說之文集卷第十三

贊 銘 箴 記

蒲津橋贊

皇帝馬上射贊

孔子堂杜預贊

崔日知寫真圖贊

盧舍那像贊

般若心經贊

二法堂贊

三歸堂贊

善法堂贊

精思院天尊贊

座右銘

進筆硯架銘

煖硯銘

素盤盃銘

溫泉箴

贈別楊盈川炯箴

東山記

蒲津橋贊

易曰利涉大川濟乎難也詩曰造舟爲梁通乎險也域中有四瀆黃河是其長河上有三橋蒲津是其一隔秦稱塞臨晉名關關西之要衝河東之輻湊必由是也其舊制橫經百丈連艦十艘辦修竿以維之繫圍木以距之亦云固矣然每冬冰未合春沍初解流斷崢嶸塞川而下如礎如臼如堆如阜或撻或搥或磨或切綆斷航破無歲不有雖殘渭南之竹仆隴坻之松敗輒更之罄不供費津吏成罪縣徒告勞以爲常矣開元十有二載皇帝聞之曰嘻我其慮哉乃思索其極敷祐于下通其變使人不倦相其宜授彼有司俾鐵代竹取堅易脮圖

其始而可久紆其終而就逸受無疆惟休亦無疆惟恤
於是大匠葢事百工獻藝賦晉國之一鼓法周官之六
齊飛廉煽炭祝融理爐是鍊是烹亦錯亦鍛結而爲連
鑠鎔而爲伏牛偶立於兩岸襟束於中潭鑠以持航牛
以繫纜亦將厭水物莫浮梁又疏其舟閒畫其鷁首必
使奔斯不突積凌不隘新法旣成永代作則原夫天意
有四旨焉濟人仁也利物義也順事禮也圖遠智也仁
以平心義以和氣禮以成政智以節財心平則應諸百
神矣氣和則感生萬物矣政成則又文之經矣財節則
豐武之德矣故天將儲其禎地將阜其用人將盈其力
聖皇之道乾乾翼翼觀藝而無窮詠功而無極

皇帝馬上射贊

第一

甘泉頓射飛野雞一隻走狐二走兔十四不隔箭連中五隻

一面昭仁 三驅示武 走則發射 伏則不取

第二

中鷹前兔

寒兔滅沒 疾鷹逞巧 鳴鏑洞飛 失雋亡狡

第三

福陽頓同日中狗前兔

狡兔雋犬 力奔勢迫 持圓驟飛 捨拔先獲

望賢頓停日射高飛雁一隻走麀二走兔三十六不隔
箭連中五隻

獸殪山豪 烏落雲雋 貫三疊兩 血不濺刃
望賢頓中獾狐

夜鳴之鳥 是謂獾狐 除人之惡 應箭而鋪
望賢頓隔馬射中麀

趨趨牙麀 寒草同色 隔馬百步 一縱而側
第四

仙遊頓中麀一走狐三走兔十八不隔箭連中八隻
天子省斂 薄狩岐陽 躬射五十 以奉蒸嘗

第五

文山頓射麋不隔箭連中二走狐一走兔二十一隻

我將獻鮮 從禽於野 一日百中 以威天下

武停頓向後射走兔其中射兔十九隻不隔箭連中十

一隻走狐三走麋二

霜兔斗迴 雲龍騰過 天旋月滿 捨矢如破

仙林頓分駿射野狐中

有芘者狐 起帝之祐 分駿遠發 應踣于手

鷄子搗鳴不著飛過在後箭射應弦而落

驚鳶上飛 鷲集橫搏 矯箭爭中 紛然旋落

一箭中兩鹿橫貫走五十餘步方倒

雙鹿並去 一箭橫連 上思陵寢 以獻時鮮

是日還宮苑內用大箭射走鹿四十口分賜諸王郡王及從人等

帝入靈囿 數百麀牡 射其四十 頒諸羣后

孔子堂杜預贊

猗歟杜侯 發揮孔聖 春秋既立 王道以正

列國行事 君子莫之 他人有心 予忖度之

推凡見例 定罪原詞 開我後學 從祀先師

金紫光祿大夫太常卿上柱國中山郡公崔日

知寫真圖贊

廓哉中山 靈宇廟徹 逸韻豪爽 達音妙絕

孝盡思成 忠全見節 優游宮侶 蕭條禪悅

白髮傳貌 青松拂雪 要之歲終 是望邦傑

盧舍那像贊 并序

詩云哀哀父母生我劬勞欲報之德昊天罔極是傷不可止也戀而懷無所及之感其有飾聖以資親修法以展慕豈非孝子持明之心哉武擔山靜亂寺盧舍那丈六鐵像者沙門履徹爲先妣用無價黃金之裝也徹師俗姓劉氏青城真人知古之弟道門釋種守律護戒了如來廣大之心達如來加持之力見虛空界劃縵茶壇知定慧手結金剛印過去不悟因後行而追福當來未聞指前緣而證道視佛相者成一切智承佛光者壞無始業張說聞其事而憚之乃合掌西南遙禮偈曰

大雄盧舍那

妙法甚深祕

神變加持力

普昇不動位

孝乎彼沙門

愛母而錫類

法財裝妙色

空色不相異

慧日破金山

慈光觸寶地

善來金剛手

一一見佛事

般若心經贊

并序

贊亡

萬行起心心人之主三乘歸一一法之宗知心無所得
是真得見一無不通是(玄)通如來說五蘊皆空人本空
也如來說諸法空相法亦空也知法照空見空舍法二
者知見復非空耶是故定與慧俱空中法立入此門者
爲明門行此路者爲超路非夫行深般若者其孰能證
於此乎祕書少監駙馬都尉滎陽鄭萬鈞深藝之士也

學有傳癖書成草聖迺揮洒手翰鐫刻心經樹聖善之寶坊啟未來之華業佛以無依相而說法本不生我無得心而傳今則無滅道濟文字意齊天壤國老張說聞而嘉焉讚揚佛事題之樂石

藍田法池寺二法堂贊

并序

法池西三歸院二法堂茲寺長老初上禪師所造也禪師本姓彭俗名知至性至孝執親之喪七日不食微言密行志道探玄究易老莊太一之旨善正書與鍾王同格其精至點畫毫縷必見也折槁荷磨文石筋理洒颯固非人力所致也中朝名士山藪高尙法流開勝遠近慕焉及晚年專意於禪誦平生藝業若遺塵矣常歎曰

帝王父母許我出家雨露生成恩猶一揆依如來教創
是功德萬一乎獻福二宮潛祐七祖將與一切咸登道
場於是三歸堂以長安元年辛丑子月望日癸未立善
法堂以開元元年癸丑五月望日戊辰建禪師母弟仁
琬弟子沙門啟疑及沙彌令哲左右斯業實有力焉

三歸堂贊

敬告諸佛子

一心清淨觀

欲求真正道

當從信根入

是佛虛空相

是法微妙光

定慧不相離

是僧和合義

人空法亦空

二空亦復空

住心三空寶

是名三歸處

善法堂贊

至哉初上人

建立善法堂

彩翠三世佛

莊嚴清淨眼

能運無礙心

普入於一切

見若不染色

知若不取識

是名眞實見

亦名解脫知

佛觀離生滅

諸法等如是

益州太清觀精思院天尊贊

并序

蜀山劉尊師上清品人也兄學儒弟奉佛迺畫三聖同在此堂煥乎有意哉達觀之一致也張說聞其風而樂之作天尊贊

正氣生神

結虛爲實

上清尊帝

中黃首出

華彩衣裳

虛無宮室

紫氣乘斗

赤鑪鍛日

十天從化

萬靈受律

蓮花釋門

麟角儒術

法共不二 心同得一 道心惟微 守而勿失

并州敕造座右銘

安萬國 禮百神 放鄭聲 遠佞人

進筆硯架銘

筆硯之間 聖心必察 青蠅導赦 震言漏洩

煖硯銘

筆鋒曉凍 墨池夜結 香炭潛然 推寒致熱

素盤盂銘 并序

國子祭酒韋公好遊山水器珍雅素因適湯泉見榎梓
枌榆良材滿谷乃命山工作爲盤盂盞罍樽罍呈其文
理素而不飾還都分遺好事者說受賴盤盂二事以銘

之云爾

幽山之木 無心世路 器爲盤盂 制以法度

匪丹匪漆 惟真惟素 理直防毀 節全思固

多用必傷 處盈招惡 嗟嗟君子 鑿微在悟

實是天然 貽我朋故

溫泉箴

東山少連曰⑤冥氏之子曰王夫安祝融氏之女曰丁
芋俱學水仙是爲溫泉之神焉帝命之救萬靈盪滯結
腑臟達膚腠泄下人多賴上帝是崇杆飛廉氏之佚女
妬之常欲大恩其坊故入溫泉必齋洒心戒以防患恕
以利物含生之疾我願除妖二神嘉之吹湯激邪珠連

漚累滂汨揚華此其效也若入溫泉僻心穢行惡言淫
形居食失節動出躁輕二神醜之不匡人命飛廉佚女
以裾褻人是生疰芒風瘍眩齟之病夫有意之醫照合
神理無恆之醫身爲慾使莫之益傷之者至矣是以君
子慎其微也

贈別楊盈川炯箴

杳杳深谷森森喬木天與之才或鮮其祿君服六藝道
德爲尊君居百里風化之源才勿驕恠政勿煩苛明神
是福而小人無冤畏其不畏存其不存作誥茲酒成敗
之根勒銘其口禍福之門雖有韶夏勿棄擊轅豈無車
馬敢贈一言

東山記

兵部尙書同中書門下三品修文館大學士韋公體含
眞靜思協幽曠雖翊亮廊廟而緬懷林藪東山之曲有
別業焉嵐氣入野榛煙出谷石潭竹岸松齋藥畹虹泉
電射雲木虛吟惚恍疑夢間關忘術茲所謂邱壑夔龍
衣冠巢許幸溫泉之歲也皇上聞而賞之迺命掌舍設
帑金吾劃次太官載酒奉常抱樂停輿輦於青靄仝翬
綸於紫雲百神朝于谷口千官飲乎池上緹騎環山朱
旆礮野縱觀空巷途歌傳壑是日卽席拜公逍遙公名
其居曰清虛原幽棲谷景移樂極天子賦詩王后帝女
宮嬪邦媛歌焉和焉以寵德也加以中宮敦序謂我諸

兄引內子於重幄見兒童於行殿家人之禮優棠棣之
詩作於是實其筐筥下以昭忠信之獻賁其束帛上以
示慈惠之恩朝野歡并君臣義洽夫飛翠華歷茨嶺至
道之主也紆紫綬期赤松素履之輔也千載一時難乎
此遇故兩曜合舍眾星聚德雅道光華高風允塞寒谷
煦景窮崖潤色猗歟盛事振古未有篆之_乙石貽代厥
後

張說之文集卷第十三

1311

1853-11

張說之文集卷第十四

碑

刺史義陽王碑

祁國公碑

裴公神道碑

文貞公碑

太子少傅蘇公碑銘

贈陳州刺史義陽王碑

昔高祖之起唐俟革隋命太宗之威四海正萬邦作藩
帝家用建王國二十一族堯之昭也十有一宗文之穆
也王諱琮字某文帝之孫紀王之子龍種異氣鳳毛秀
色仁義天啟德威日就學無不探藝無不究故齊王之
愔以爵推恩周公之子以才分政總角封義陽郡王弱

冠拜歸州刺史又守檀州又撫沂州若敖之舊荆人是
懲單于之衝胡馬自遠淮沂其又邦國不空遭王運中
微投於南海書稱大去憫失土之諸侯禮不逃誅議無
辜之王于某年月日邁六道酷吏薨於桂林之野春秋
五十神龍之初興廢繼絕追贈陳州刺史王生不得志
沒受遺榮信乎才之短長不如命之豐約德之輕重不
如藝之厚薄者矣季子豫州刺史行休髻齷羈孤託身
炎厲藐是餘慶歸然獨存泣血上請迎喪遠裔開元四
年二月至桂州王同氣三人往偕遇禍殞殮無主封樹
缺如歲月茫茫盡爲野草問鄰母而失處訪樵童而莫
識議者以爲不可復得宜招魂而葬行休拊心蒼昊誓

不徒還乃掃亭館設地席絜齋懇惻覬乎幽報遂頻夜
髣像曲示其端夢魯王乘舟舟分爲兩旣而適野見東
洲中斷因忽悟焉陰隱微明率此類也又靈堂鑱莖一
夕自屈管上有三指凹迹一奇二並其傍鐵生文理布
列成卦眾駭其異使善易者張法著之曰屈者於文爲
尸出指者於義爲指蹤一奇二並三殯近闔若引渦山
揆之可以察先王之心矣考夢協卜定處剋辰以其月
二十八日於桂城東洲發見神柩舉體咸備而一節闕
焉行休甚痛惋若自毀裂其夜又夢王告在南洛州厥
明直舊殯而南十有九步沙洲痕下插而得之安合如
故他日北郭之外併收二叔父焉於是乎驗著夢之有

徵也子子三旒連舳歸飛遙遙百越經途瞻歎零桂人
以爲美談夫至孝潛通精魄昭應果虛無之見推步而
有必窈冥之體尋求而致雖前志所詳未有幽感反覆
若斯之昭晰矣以某年月日陪葬於昭陵柏城妃汝南
周氏祔焉禮也妃考曰駙馬都尉梁郡襄公妣曰臨川
大長公主宗周元胄大君自出左右圖史循環法度邦
有好逮室无偕老以王之故薨於掖宮初永昌之難王
下河南獄妃錄司農寺唯有芳氏屏屨布衣往來供饋
徒行頰色傷動人倫中外咨嗟目爲勤孝王二子配在
檮州及六道使之用刑也長曰行遠以冠就戮次曰行
芳以童當捨芳啼號抱行遠乞代兄命旣不見聽固求

同盡西南傷之稱爲死悌君子謂勤孝者仁之厚也死悌者友之難也感神者誠之至也此三者有以見義陽之義方賢妃之內訓繼體之崇德夫如是淳美上歸乎本朝盛烈延耀乎邦族安可闕而不飾碑版無文而已哉銘曰

高邱白雲 維堯大理 函谷紫氣 維周柱史

百代福流 千齡運起 富有海內 貴爲天子

聖帝才子 於穆紀王 賢王祚膺 倬哉義陽

慎徽九德 九德有常 允釐三郡 三郡以康

明夷于飛 丹崖之下 梁木其壞 桂林之野

不識阡陌 無存松檟 于以求之 人無知者

哀哀孝子 眷眷靈夢 語妙常閭 文微甄仲

南洛占從

東洲億中

舊窳移編

新棺改贈

既克返葬

亦耐山陵

卜云其吉

神心允憑

人非地是

迹謝名稱

青青松柏

不顯不承

祁國公碑奉 敕撰

維天命帝子萬邦維坤配乾母萬物以親九族后父之屬尊以敘百官開府之班最執謙德而光重地者則祁國公其人也公諱仁皎字鳴鶴太原祁人王子賓天啟靈仙之族司徒衛漢大忠義之門盛德之後仁賢繼出曾祖景孝隋屯田侍郎祖詮歙縣男贈汾州刺史考文洎贈右僕射續戎前烈啟迪後人公之生也膺汾霍之禎體敦龐之度禮樂狃於代襲忠孝萌於自然克寬克

恭不激不傲鑿窮未兆而養之以蒙智周無際而處之以默故質勝於文行過於譽其隱德也三年不鳴其會時也一日千里初以翊衛調同州參軍換晉州司兵應將帥舉授甘泉府果毅遷左衛中郎將上昇春宮后正如壺擢將作大匠事時工練八材孔脩轉太僕正卿駟訓車攻六飛如舞先天內禪引伸外戚懷柔畏滿馱劇思閑公既深辭以職事上亦優之以散秩加特進禮異羣公拜開府儀同三司策上柱國封祁國公邑戶三千實賦三百公於是寓情宴喜簡跡朝行入告嘉猷密而人莫窺也陰薦多士晦而人莫知也不自異於當路每同塵於眾流常語所親曰明明天子擇賢其理瓌瓌姻

姬則無黜仕不識不知樂我而已善矣夫人臣位極遇莫大焉王曰外舅厚莫重焉而能明道若昧進道若退事不事而縣解爲不爲而理會一以無目牛之全一以無亢龍之悔所謂言合古行中權歟後之人慎終始而保福祿者固將沿通波而蹈高軌也享年六十有九開元七年四月戊寅薨於京師皇上悼焉設次大臨輟朝累日榮之以華袞寵之以飾終追贈太尉益州大都督賜東園祕器哈毳贈錫率加常禮乃命尙書彭城侯劉知柔攝大鴻臚俾之監護京兆少尹崔琬介焉申命詹事南安侯龐承宗持節弔祭左庶子白知慎倅焉公卿命士更弔迭唁溢巷填街爲之縞素粵以十月初吉葬

我昭宣公羣官執紼祖奠國門如前會夫天作聖合必
起大邦故軒妃美於西陵周婦表於東海公蕃衍之慶
祚○二十或哲或謀或肅或乂永錫之類也如是元女
祥發望雲業參煉石內被螽斯之德外偃關雎之化門
風之至也如彼長子惟力戴君畢心禦侮奉雲雷之會
懸日月之功庭訓之致也如此高陽有才子八族我盈其
二武王有理臣十人家出其兩稽諸舊史罕或前聞若乃
積三盛事而重之以純德篆於金石垂於億萬宜哉其文
字光華撰錄旨要則皇帝所爲也詞臣奉詔作之其銘曰
於穆祁公 誕靈信厚 有倬其慶 天子外舅
高以卑牧 盈將沖守 忠焉孝乎 沒而不朽

人之忠孝 其德不同 天俾純嘏 大福時來

貴踰九列 榮並三台 祚之之社 帝曰欽哉

祁公之德 柔嘉維則 令儀令色 小心翼翼

如何昊天 喪此邦式 休問其永 豐石是刻

我思肥泉 孝心罔極

贈太尉裴公神道碑

星辰懸象所以殷時布氣然而行不言之道者天也文武用才所以勤官定國然而致無爲之理者帝也當高宗之休運任名世之良臣清九流而闢四海代天工而張帝德歷選前哲豈多乎哉公諱行儉字守約河東聞喜人也其先出乎嬴姓伯翳之後也秦則裴侯始封漢

則侍中受職魏晉之代鬱爲盛門八裴方於八王聲振
海內三子尊爲三祖望高士族自冀州刺史徽至公十
二代中軍將軍雙虎至公六葉代無違德不隕厥問者
已大王父伯鳳周驃騎大將軍光汾二州刺史琅琊郡
開國公大父定高大將軍馮翊郡守襲琅琊郡公諸侯
受封山河傳國天子共理循良克家考仁基隋左光祿
大夫以陰圖王充仗義舊主遭時不利玉折名揚聖唐
隆興旌淑勵節贈原州都督命諡曰忠蓋春秋之褒也
公清明本乎世德正性出乎胎教氣潤河靈貌雄岳立
仁孝之道天生而知將相之器與年俱長以高蔭爲⑤
文生絕事篤學累年不舉房僕射異而問焉對曰隋室

喪亂家乏典籍館有良書探討未徧故少留耳梁公驚曰驥子志氣凌雲當一日千里其早爲通人之目也如是明經補左屯衛倉曹詔舉轉雍州司士選金部戶部二員外歷都官郎中長安令明慶中與長孫太尉褚河南論及中宮廢立國家憂患有公伯寮譜行於季氏出爲西州長史又改金山副都護又拜安西大都護西域從政七八年間窮荒舉落重譯向化我之獨賢邊之多幸乾封歲徵爲同文少卿尋除司列少常伯官復舊號爲吏部侍郎加銀青光祿大夫自居銓管大設綱綜辨職差才審官序爵法著新格言成故事上元中長星出天禿髮入塞詔公爲洮州道左軍總管又爲秦州鎮撫

右軍總管並受元帥周王節度雖祭公有諫耀武之事
不行而方叔帥師來威之道備矣儀鳳二年十姓生可
汗匐延郅支李遮匐潛構大戎俶擾西域朝廷憑怒將
行天討公進議曰敬亥敗績於茅戎審禮免胄而入狄
豈可絕域更勤王師今波斯王亡侍子在此若命使冊
立則路由二蕃便宜取之是成擒也高宗善其計詔公
以名冊送波斯兼安撫大使公往蒞遺愛洽於人心是
行也百城故老望塵而雅拜四鎮酋渠連營而酌酒一
言召募萬騎雲集公乃解嚴以反謀託獵以訓旅誤之
多方聞其無備裹糧十日執郅支於帳前破竹一呼鉗
遮匐於麾下華戎相慶立碑碎葉蓋美克雋不殺而用

謀安人以德而去害廓氛祲於地表燁皇靈於天外充
國有屯田之頌寶憲有燕山之銘詢茲遠略彼何微也
遷禮部尙書加上柱國又特降恩命兼右衛大將軍夷
典秩宗神必據我文昌有將天道存焉調露中單于可
汗伏念外叛大鴻臚蕭嗣業喪律詔公爲定襄道大總
管軍至朔州斥候相接匈奴故態犷劫糧以餒師神將
出奇張虛勢以陷敵乃僞爲轉運伏其壯士示羸師以
緩行隱精騎以躡迹寇果大下援兵奔散驕虜益驚自
爲得色驅此車牛憩彼泉井於是箱中兵起干弩齊發
要路騎飛一息而至羣胡顛沛殺傷滿野從茲饋運路
無驚者觀夫大漠無倪穹廬靡所追之逃遯捨之憑陵

費日老師兵家所病公潛使緩頰均其利心深圖既入
狼意遂改乃委罪衙官陰送降狀公密上其事人莫知
之及其期舉國歸附煙塵大起師徒惶惑公徐使令
軍曰此是伏念執溫傳來降非他寇也俄而銜璧轅門
釋縛納款帝嘉厥勳命尙書崔知悌乘駟勞軍備禮獻
凱策勳之日程務挺張虔勗者行軍之偏將也訴言子
營逼逐方降大軍又屬秉鈞忌才下上其手公曰雖不
逮羣帥之讓力猶恥二王之競功今而殺降後無來者
乃封聞喜縣開國公而伏念溫傳皆戮都市是年也伏
念弟元珍擁其餘種復叛則天稱制追正宿枉贈伏念
大僕卿程張諸家別故夷族君子以爲神理之不可誣

也永淳元年詔公爲金牙道大總管未行遭疾四月二十八日薨於京師延壽里春秋六十有四長子貞隱早卒嫡孫參_玄嗣封藐是諸孤哀哀童幼高宗悼焉贈幽州都督賜凶儀還鄉喪葬官供禮部郎中監護窆窆之數率禮有加別敕留守委皇太子擇六品京官一人檢校家事五六年間待兒孫稍成長日停寵極哀榮禮之厚者澤及存沒義莫重焉太常議諡博古多能文武表式曰憲其年十月葬我憲公於聞喜之東良原禮也神龍中興朝思舊德贈公揚州大都督開元孝享宰嗣延恩贈公太尉生不登乎台階沒追位乎靈宰序四時於下地調三光於上天聖人神教意在茲乎公志堅慮精

神勇識澈藝必討本學皆視奧又善測候雲物推步氣象鬼無遯謀靈不藏用著文集二十卷造草字數千文皆寶傳人間以爲世法又撰選譜十卷又爲軍營行陣部眾料敵等三十六訣大聖天后令祕書監武承嗣就家收進以爲祕術豈比馬卿浮華惟留封禪之草劉安虛誕空傳鴻寶之書而已哉加以汲引沈淪推獎氣類虛懷而襟帶不設弘亮而藏府洞開故虎旅雲從詞林響應若毛羽之宗麟鳳眾川之長江河也在選曹見路賓王盧照鄰王勃楊炯評曰炯雖有才名不過令長其餘華而不實鮮克令終見蘇味道王劇歎曰十數年外當居衡石後各如其言其在軍麾擇帳下之士則有張

知運薛訥閻敬容甘元暕裴思諒王智方呂休璟劉_玄意引偏裨之將則有程務挺張虔勗王方翼崔智譽党金毗郭待封劉敬同李多祚黑齒常之等凡所進拔盡爲名將此則有道之人倫武侯之賞鑒也公之送波斯也入莫賀延磧中遇風沙大起天地冥晦引導皆迷公因命息徒至誠虔禱徇於眾曰井泉不遠須臾風止氛開有香泉豐草宛在營側後來之人莫知其處此乃耿恭之拜井商人之化城也公在禮闈敕賜善馬及寶鞍令史奔馳馬倒鞍破懼而逃罪公使召之曰知汝誤耳又平郅支遮旬大獲珍異酋長將吏請徧觀焉有瑪腦大盤希代寶也隨軍王休烈捧盤跌倒應時而碎叩頭

流血惶怖請死公笑曰事有不意何至重玉而害人乎此又文饒之含容邴吉之仁恕也公西擒郅支北降伏念前後錫馬五百匹僮二百人金銀器物三千品錦罽織皮六百段公受置庭中旬日散盡此又趙奢之待士田文之市義也若夫知人以為本感通以為行善貸以為常散積以為樂古之有道者嘗從事於斯矣公元夫人河南陸氏兵部侍郎爽之女也陸氏卒繼室以華陽夫人庫狄氏有任姒之德班左之才聖后臨朝召入宮闈拜為御正中宗踐祚歸養私門歲時致禮媯后補天進參十亂少康嗣夏退協三從晉朝公卿列拜虞譚之母周官音注近出韋逞之家皇上臨極旁求陰政再降

綸言將留內輔夫人深戒榮滿遠悟真筌固辭羸憊超
謝塵俗每讀信行禪師集錄永期遵奉開元五年四月
二日歸真京邑其年八月遷窆於終南山鷓鳴堆信行
禪師靈塔之後古不合葬魂無不之成遺志也參(玄)官
至涇鄧二州刺史聿脩厥德人亡道存次子延休并州
汶水令世載文雄家傳草聖次子慶遠協律郎深達禮
樂克和神人咸負長才同淪短運季子光庭侍中兼吏
部尙書輔政邕熙致君堯舜孝理發乎陵廟仁澤徧乎
松檟是故妻以夫榮母以子貴尙書先贈方伯申命上
公夫人舊封華陽增號晉國詩云文武吉甫萬邦之憲
上公有焉又曰彼美孟姜德音不忘小君有焉孝經云

立身行道以顯父母侍中有焉合三德而爲家橫百世
而濟美信可以言時稱代鏤石刊金者歟神道前銘薛
令所撰且有後命俾余係述馬遷世家益孟堅之一傳
劉寬表墓並伯喈之兩碑報德教忠俱傳不朽銘曰

天生亞聖 祚此王國 文綜九流 武參七德

柔遠服叛 窮西盡北 赫我皇靈 去其蠹賊

仁則不遠 智何不周 如山之峻 如川之流

術與神合 藝將道遊 書來懸帳 賦出登樓

司馬軍陣 官人綱紀 帝嘉常伯 國于聞喜

室有令妻 家成克子 社金傳世 桓珪守祀

神爲上台 永介邦社

故開府儀同三司上柱國贈揚州刺史大都督

梁國文貞公碑奉 敕撰

敘曰入柱承天高明之位定四時成歲亭毒之功存畫
爲九州禹也堯享鴻名播時百穀棄也舜稱至德由此
言之知人則哲非賢罔又致君堯舜何代無人有唐元
宰曰梁文貞公者位爲帝之四輔才爲國之六翮言爲
代之軌物行爲人之師表蓋維嶽降神應時問出者也
公諱崇字元之姚姓有虞之後遠自吳興近徙于陝
今家洛陽焉烈考長沙文獻公樹勳王室建旗嚮府公
紈綺而孤克廣前業激昂成學榮問日流武庫則矛戟
森然文房則禮樂盡在弱冠補孝敬挽郎又制舉高第

歷佐濮鄭並有聲華入爲司刑承天授之際獄吏峻密
公持法無頗全活者眾進夏官員外郎郎中侍郎朝廷
曰能遂掌軍國遷鳳閣侍郎監修國史兼相王府長史
始則天人讓王承置醴之願終以飛龍利見延驂乘之
恩自時厥後恆當大任凡三處兵部尙書三入中書令
一爲禮部尙書左庶子又肅政大夫總靈武庫兵馬又
司僕卿知隴右監牧使出典亭宋常越許申徐潞揚同
十郡景雲初以藩邸舊寮封梁國公食賦百室公性仁
恕行簡易虛懷汎愛而涇渭不雜眞率徑盡而應變無
窮常推是心以御於物故所蒞必叱庶風偃驚狼化從
言不厲而教成政不威而事理去思覩頌來暮聞歌旣

登邦政卒乘輯睦及在宗伯神人允諧今之中書是爲
理本謀事兼於百揆論道總於三台公執國之鈞金玉
王度大渾順序休徵來臻懋德格天名遂身遜拜開府
儀同三司崇其秩逸其志也初太夫人在堂公授職西
掖頗限肩禁求侍晨昏優詔旣許尋令還職公固請以
泣制曰家有令弟足慰母心國有棟臣安可暫闕其後
剖符江表敦諭起復衰麻外墨藥棘內毀變禮中權通
識所貴神龍之首與聞興復疇其非賦累讓而停夫以
革故鼎新大來小往得喪而不形於色進退而不失其
正者鮮矣君子曰忠不忘親仁也哀不違事義也讓功
辭邑禮也濟代全名智也仁以長人義以和禮以安

上智以周身宜其光輔四帝軒冕三紀池臺琴筑優游
暮齒傳爵土於祚（胤）保祿位於終始矣享年七十有一
開元九年九月寢疾薨于東都之慈惠里皇上悼焉國
人慕焉撫牀輟春曾未云比制贈揚州大都督諡曰文
貞禮也十年二月葬於萬安山之南原在疾也王人賜
膳御醫視藥于薨也中使弔臨羽儀哀送君臣之義厚
莫重焉子昇奕思綴遺美以寘罔極有詔掌文之官敘
事盛德之老銘功將以龍宗臣揚英烈帝乃灑恩仙翰
鏤澤豐砥日月照臨於佳城煙雲變態於神道竇其文
字別爲羣玉之山禁其樵蘇卽表三司之墓銘曰

源深自虞 派別從吳 避地魯陝 居家洛都

神明遠契 岳瀆冥符 翊聖斯偶 生賢不孤

仁將勇濟 孝與忠俱 學刃攢植 文鋒迅驅

纒安卑位 卽騁長途 唯實唯有 若虛若無

再三軍國 一二訏謨 戎柄尤重 王綸最樞

兼司任切 久政榮殊 黼藻彌煥 丹青靡渝

以寬容物 以鑒分區 外或形放 中恆禮拘

箴雖緘口 諍亦忘軀 但覩渾璞 誰詳瑾瑜

伊咎尺寸 管樂錙銖 名正身遂 言誠願孚

方辭漢祿 更辱齊租 旣積而散 窮歡盡娛

川歸東極 日去西晡 上惻旒宸 旁悲路衢

藍田美玉 荔浦明珠 載廣休慶 爰引典謨

豐碑乃立 盛業其鋪 帝念頻軫 仙毫特紆

鐫金刻石 鳳篆龍圖 七耀光動 三泉澤濡

銓能敘事 理鬱詞敷 求舊銘實 懋殫惡蕪

緬思雲霧 尙想江湖 有道之德 其何以踰

延陵之墓 空此嗚呼 存沒終始 遐哉邈乎

故太子少傅蘇公碑銘 盧藏用撰序不錄

斤斤蘇公 體正含道 稟靈^淳粹 爲唐元老

忠以衛主 孝以立身 文以經國 惠以安人

司牧九郡 九郡爰靜 平章百工 百工爰整

千載典憲 三朝綱領 上纂先人 五代相國

下垂餘慶 一子令德 帝謂庭碩 伊公是似

接待玉墀 序拜金阼 聯華疊潤 佐我天子
於戲彼蒼 國幹云亡 地頽五嶽 天坼三光
備禮詔葬 羣官會喪 掌史司德 刊銘路旁

張說之文集卷第十四

張說之文集卷第十五

表

請封太山表

請爲千秋節表

請置屯田表

禮儀使賀祥瑞表

賀太陽不虧表

賀大衍麻表

請許王公百官封太山表

并批答

臣說等言臣聞聖人者與天地合德故珍符休命不可得而辭鴻名盛典不可得而讓陛下功格上天澤流厚載三五之盛莫能比崇登封告成理協幽贊故符瑞必臻天意也書軌大同人事也菽粟屢登和平也刑罰不用至理也今陛下稽天意以固辭違人事以久讓是和

平而不崇昭報至理而闕薦祖宗億兆之情猶知不可
況上帝臨照祖宗顧諟其可止乎願納王公卿士列岳
縉紳之眾望迴命有司速定大典臣不勝懇禱敢昧死
再拜

朕以眇身欽承丕業十餘載矣夙夜兢惕常以至道未
暢元元未安上累先聖之心下受萬方之責何敢議封
禪躡岱宗乎今羣官所奏靈符歲稔戎狄向風蓋上天
降休宗廟垂福豈朕薄德冒以當仁然天休不敢不答
廟祐不敢不報王公眾望不可固違將以蒙福謝誠非
以成功類帝輒用忘忌祇遂羣心

請八月五日爲千秋節表

并敕旨

左丞相臣說右丞相臣璟等言臣聞聖人出則日月記其初王澤深則風俗傳其後故少昊著流虹之感商湯本^玄鳥之命孟夏有佛生之供仲春脩道祖之錄追始尋源其義一也伏惟開元神武皇帝陛下二氣含神九龍浴聖清明總於玉靈爽朗冠於金天月惟仲秋日在端五恆星不見之夜祥光照室之朝羣臣相賀誕聖之辰也焉可不以爲嘉節乎比夫曲水禊亭重陽射圃五日綵綰七夕粉筵豈同年而語也臣不勝大願以八月露醇耐上萬歲壽酒王公戚里進金鏡緩帶土庶以結絲承露囊更相遺問村社作壽酒宴樂名賽白帝報田

神上明亥天光啟大聖下彰皇化垂裕無窮異域占風
同見美俗

敕旨凡是節日或以天氣推移或因人事表紀八月五
日是朕生辰感先聖之慶靈荷皇天之眷命卿等請爲
令節上獻嘉名勝地良遊清秋高興百穀豐熟萬寶已
成自我作古舉無越禮朝野同歡足爲美事依卿來請
宜付所司

請置屯田表

臣說言臣聞求人安者莫過於足食求國富者莫先於
疾耕臣再任河北備知川澤竊見漳水可以灌巨野淇
水可以溉湯陰若開屯田不減萬頃化萑葦爲秔稻變

斥鹵爲膏腴用力非多爲利甚溥諺云歲在申酉乞漿
得酒來歲甫爾春事方興願陛下不失天時急趨地利
上可以豐國下可以廩邊河漕通流易於轉運此百代
之利也當今國儲未贍邊軍未息勸人業農願留聖意
亦嘗賜前階之食承後騎之願竟唯唯而無一言者豈
敢隱情於聖主也正以職在仗衛憂於部伍馬上非公
議之所冒遊非朝廷之事今昧死上愚見乞大臣籌謀
速下河北支度及溝渠使檢料施功不後農節謹奉表
以聞謹言

禮儀使賀五陵祥瑞表

并答制

右臣等伏以陛下孝通天地親朝五陵拜橋陵則紫氣

見獲白兔甘露降白鴿巢天光清和日色明朗拜定陵
則有景雲見甘露降拜獻陵則甘露被樹祥雲抱日拜
昭陵則先聖見於神遊薦享之際陛下親聞欬息初進
服用樂器自然發聲又素像迴面甘露降滋從祀先臣
歷聞蹈舞拜乾陵則有靈草生甘露降日抱戴之瑞此
皆陛下虔誠上感神靈福降四海同歡萬方抃躍臣等
幸陪大禮親覩禎祥無任大慶之至謹奉表陳賀以聞
臣說謹言

朝拜園陵罄申精到深懼虛昧未感靈心今嘉瑞來臻
神無譴怒欽承祥祉兢慶兼懷儒林史官當賁朝典

集賢院賀太陽不虧表

并答制

太史奏太陽不虧聖德上感變災爲瑞陽光增暉陰慝不作休徵之美莫盛於斯臣等無任欣抃之至謹進狀陳賀以聞謹進

彼日而蝕詩人所醜應虧不變轉異爲臧未知天意降休將或疇人未洽媿無一言之善而同三舍之慶循省來章用增勵惕

賀大衍^麻表

臣說言伏以開元大衍^麻天旨裁其紀綱日官考其精要履端更始敬授惟新加以辨五行之序推七精之數明徵聖期實光上德臣又見梁天監中陶^弘景著玉匱記云盛德木子以肇來運頃者僧一行推璿衡^麻得皇

家天命成數千年古今祥兆若合符契麻數既在於聖躬卜年又表於長麻莫大之慶獨冠前王臣忝跡儒林預聞昌運無任抃躍之至謹奉表陳賀以聞

張說之文集卷第十五

張說之文集卷第十六

碑銘

王公神道碑

安公碑銘

冉府君神道碑

華州楊君碑

馮府君神道碑

唐故夏州都督太原王公神道碑

良玉禮神用之西序之器捨之南山之璞罔然不有其珍也君子安命進之扞城之雄退之去國之老隕然不失其正也語夫仗運以行道屬辭以比德亦何代無其人哉公諱方翼字仲翔太原祁人王周之後也王子以敗狄受姓徵君以遯世爲名司徒之濟艱難義形漢室

太尉之圖舉甲心盡魏朝聞蔣濟所言則知尚書志力
兄弟繼美覽周書所載則見潁川忠烈子姪皆封臣節
奮揚於百代家聲藉甚於四海大王父司徒定公秉隋
氏之崇也王父駙馬開府文公裕先朝之懿也考特進
慎公仁表皇室之甥也公門總四岳之靈帝子分五潢
之氣是生時傑鬱爲仁紀公雄姿沈毅凜難犯之色虛
懷信厚坦招納之量識略精斷達應變之權神守密靜
堅不奪之節孝友內兆於克懷忠敬外灼於旣冠加以
思參造化誠合鬼神文其詩書武其韜略推此才也以
從政焉永無匱矣夙遭家艱哀過柴瘁京師號曰孝童
王母同安長公主引貴遊之誠示作苦之端今太夫人

徙居鄜墅儲無斗粟庇無尺椽公躬率庸保肆勤給養
墾山出田燎松鬻墨一年而良疇千畝二年而廈屋百
間三年則日舉壽觴賦珍膳矣處約能久不亦仁乎在
困能亨不亦智乎永徽初始宰安定誅豪暴以育人察
姦宄以申冤異政三舉清風一變除瀚海都護府司馬
以母疾辭職爲姜恪乘便遂徙朔州尙德府果毅歲餘
王本立上書理公國之惇老不宜擯抑有詔徵還而親
不待心與哀絕氣屬禮存詔御醫孟默朝夕診視免喪
逾年僅堪履立樂成公東討新羅薦爲將帥詔公持節
雜林道總管軍停不行授沙州刺史未至改拜肅州以
爲慢防啟寇非重閉也乃大築雉堞嚴備櫓械人知有

恃戎亦來威儀鳳歲河西盡蝗獨不入境鄰郡湊稔提
挈如雲公傾私泉以資乏引激水以立磴舉火百竈日
舖千人遂有芝草聚生豐年屢降人之詠德刊石存焉
裴吏部名立波斯實取遮旬偉公威厲飛書薦請詔公
爲波斯軍副使兼安西都護上柱國以安西都護杜懷
寶爲庭州刺史公城碎葉街郭迴互夷夏縱觀莫究端
倪三十六蕃承風謁賀自泪汗海東肅如也無何詔公
爲庭州刺史以波斯使領金山都護前使杜懷寶更統
安西鎮守碎葉朝廷始以鎮不甯蕃故授公代寶又以
求不失鎮復命寶代公夫然有以見諸蕃之心搖矣於
是車薄啜首唱寇兵羣蕃響應蝟毛而豎公在磧西捷

無虛歲蹙車薄於弓月陷咽麪於熱海剿叛徒三千於
麾下走烏鶻十萬於域外皆以少覆眾以誠動天葛水
暴長祭徹而三軍涉渡葉河無舟兵叩而七月冰合由
是士卒益勇戎狄益懼璽書下問皇靈遠爍遷夏州都
督徵詣奉天宮熱海之役流矢貫臂陣血染袖事等殷
輪帝顧而問之視瘡歔歔曰爲國致身乃吾親也妖賊
白鐵子據平城以反奉詔與程務挺討擒之善公有發
石壞城之計反風焚柵之感封太原郡公元珍寇邊受
命討擊公以無甲乃發思造六片木排袴開鈕解合畫
爲虎文北至開光與虜合戰若驅猛獸蒙皋比之莫敵
也胡馬奔駭獲其二啜桑乾舍利兩部來降初公善書

與魏叔琬相輩工射與趙持滿齊名帝每矚之賜比鳴
輦賞深懸帳嘗獨行入夜有怪人長丈直來趣逼射而
仆焉乃朽木也太宗壯之授右千牛及持滿伏法暴骸
公哀而收葬爲執金吾奏劾高宗義之釋而不罪履道
坦坦多如此類適將任帝夔龍爲國方虎天下膏潤羣
生雲雨惜哉不辰悄焉邁侮嗣聖之際天后臨朝有凶
人誣奏公廢后從兄常懷怏怏司刑御史侮文矯制不
名苛法遷於崖州路至衡州寢疾捐館春秋六十有三
垂拱三年閏正月二十九日葬於咸陽原君子曰斯才
也斯望也難乎免于斯之代也周公聖而謗屈平賢而
放賈誼才而謫李廣勞而喪彼天命之糾紛此人情之

惆悵神龍中興以陷酷吏例復官爵孝爲人極忠爲令
德神之聽之始枉終直信矣有子故光祿少卿璵今祕
書監珣皆篤行純孝慎終思遠說少也蒙會友升堂今
老矣豈能文旌墓遷司漢籍感激論都尉之書邕敘彪
情追美樹楊公之碣銘曰

上德惟公 氣秀才傑 孝孔世美 忠廣前烈

日月心照 江河思決 難地必通 暗機先徹

卓犖文藝 崢嶸武節 歎由宰邑 借恂臨郡

海女避途 山蛇可問 師律三總 軍聲六振

銳氣入營 長雲出陣 肅將國威 烜赫天外

玉弩方擎 雲旗卷旆 天道茫茫 自古多傷

功存西域 身棄南荒 易簣中路 懸棺反藏

寶刀生衣 玉玦無光 後有才子 先賢不忘

河西節度副大使安公碑銘 并序

公諱忠敬字某武威人也軒轅帝孫降居弱水安息王子以國爲姓世高之違漢季自河南而適遼東高陽之受魏封由陰山而宅涼土高陽王同生尙書左僕射河間公原晤眞河間生建節將軍西平公纘從正西平生龍驤將軍黃門侍郎廣宗侯薛誥徵累葉動華載於魏史高祖何臧器廣宗之子也周開府儀同三司甯遠將軍肅州刺史張掖郡公會祖羅方大隋開府儀同三司皇朝贈石州刺史貴鄉公祖興貴右武侯大將軍涼州

刺史徙封榮涼歸三國公考文生不仕涼公皇運經綸
首平李軌大舉河隍之地遠通城郭之國寵錫蕃庶冠
絕等夷水出渥洼之神文馬者二千乘山得崆峒之武
朱輪者四十人公育榮盛之門鬱豪爽之氣孝友天至
清華玉立幼聚童兒必爲軍陣之戲長交英俊唯談韜
略之書始以良家子僕射韋公待價引於帳下安息軍
建奇績解褐授遊擊將軍臨洮府右果毅復以善部統
御史大夫唐公休璟處之前鋒洪源谷立異效遷右威
衛翊府右郎將兼新泉軍使進本衛中郎將赤水軍副
使兼赤水新泉兩軍監牧使改會州刺史營田使換松
州都督防禦使遷左司禦率兼河西節度副大使臨洮

軍使轉鄯州都督使如故其在軍州傾心下士視人如子無約而親附不言而條理其在農牧大田多稼如茨如梁思馬斯才有驕有皇輸力四朝厯官三紀名參禁衛身任疆場以靜總繁以逸待寇我無亡鏃之費敵有不戰之屈茲所謂一方之干城者也享年六十有六開元十四年十一月二十八日寢疾終位知與不知莫不隕涕十五年某月葬於烏城之南志公鄉祔先塋也公寬以御眾卑以自牧直而無訐廉而無劌朋友不聞臧否之言家人不見喜愠之色加以心淨三業躬勤八戒推是而行何往不濟初甘州有舍利沙多禪師道場之四果也嘗云檀越德充於內神護於外雖冒鋒鏑永無

害也及百戰之後啟手歸全西州士人聞之激厲有子
仲璋如璋季璋全璋重璋庭襲芝蘭喪過欒棘敬奉窀
窆備禮儀於文武撰述家風刻功名於金石詞曰

玉關氣爽 金波秋激 涼野蕭條 寒山積雪

授靈產義 精勁才傑 孝固純深 忠惟剛烈

負羽從軍 奮飛青雲 麾幢按部 惠流時雨

總軍挾郡 入文出武 三十年間 式遏戎虜

壇場務靜 非公莫鎮 金鼓氣雄 非公莫震

神山與缺 龍池取駿 霹靂陷營 衝風入陣

勇將知時 仁兵善持 反耕去戰 王者之師

牧馬如雲 屯庾如坻 西軍方壯 東首長辭

振古同嗟 沒而不死 所謂明德 永傳神理

鍾鼎題門 珠玉名子 信言豐石 令問不已

河州刺史冉府君神道碑

昔者堯舜既沒文武將墜天縱孔聖誕敷皇極於是乎
恢六藝而正王道舉十哲而闡微言雍也爲德行之目
求也爲政事之首吾見乎龍翰鳳雛百世而共貫虎符
犀節重世而增華明德之後知其必大公諱實字茂實
其先魯國鄒人也古天子有相氏宅于相土實曰冉姓
蓋氏族之興舊矣不常厥所今爲河南人焉五代祖睢
陽公諱道周尙齊南康公主位平南將軍散騎常侍荆
州刺史信州都督高祖軫仕梁太子左內率荊州刺史

齊梁之閒荆巫重鎮世善其職江漢宜之大曾父義城
公黎在梁雲麾將軍湖州刺史入周拜驃騎開府儀同
至隋開皇中爲旭州刺史大父黃國莊公諱安昌隋啟
平城祚之穀璧唐分蜀國瑞以桓珪其後改封於黃授
信州刺史歷潭州總管贈夔州都督烈考天水郡果公
諱仁才秩金紫光祿大夫婚皇室漢南縣主經浦澧袁
江陵永凡六州刺史偉矣哉承家善慶歷代名臣流風
載於史官勳業藏於王府公果公季子天王自出內稟
胎教混成之姿外被門風式瞻之訓從容合度造次皆
法生而知之孝悌也學而知之禮樂也德義如山文章
如泉搢紳之士仰焉宗焉弱冠文學士擢第遭家

不造府君捐館五日絕漿三年泣血雖麻葛就禮而樂
棘加人服闋調并州大都督府參軍事丁太夫人憂過
哀終喪有如前制應入科舉策問高第授絳州司戶參
軍轉揚州都府倉曹參軍又舉四科敷言簡帝除益州
導江縣令鴻漸二鎮翰飛三蜀府中之孫子荆郡內之
岑公孝用能據淮距海我庾如岷山導江入境先歎
加朝散大夫除鄜州長史仍加關內道支度使去青城
之洞府來白帝之鄜祠命服有輝使車何重除婺州司
馬入謝于武成殿皇上以邊庭有事喜問陳湯宣室清
言思逢賈誼公召對蘊藉謀慮深長眷甚前席恩加後
命因改恆州長史于時四鎮未復二蕃猶梗屯田遶塞

戎馬在郊代郡藏符臨冀北而誠重漢家張掖比西河而還輕乃徙拜涼州都督府長史仍知赤水軍兵馬河西諸軍支度使地壯伏龍城雄飛鳥位居半刺總管三邊公乃利溝洫懋蔗葭芻藁積糗糧均轉輸程力役寬御悅使授方任能人胥忘其久勞兵不遠其長道雖金方氣映雨雪不交之地磧路沙霾草木不植之所莫不豐滯穗於坳牧厭甘瓜於戍時朝廷賴之遷使持節河州刺使仍營田使崆峒連五郡之壤磧石控九河之源公夙奉皇華政聞行露高車未至闔境相歡既見君子溫其如玉率性仁愛由衷易簡推是心也物感斯應覩恭肅而無競見禮義而興行不言而庶事熙非教而

羣下順故得大田多稼人和歲豐餉軍廩師處勤餘裕
計偕入朝侍宴於長壽殿上謂公曰河州軍鎮要衝屯
田最多卿以足食爲心朕無西顧之憂侑以彩幣錫以
文袞及公還州也璽書勞勉王人相繼國家徑流沙梁
弱水收西域護南庭連百萬之兵以濟事於外不一日
而乏者則公之力也無駭入極可謂費庠父勝之杜預
平吳蓋知羊叔子功爾宜登元老作貳天朝止于邊服
實孤人望享年七十有一證聖元年二月十日寢疾終
於官舍天子悼焉凶費喪歸悉命官給是日河隍耆老
山谷羌夷反首務面號奔州邑雖國亡子產吏哭祭遵
豈云過也愷悌之化人之父母及其沒也哀亦如之信

矣太夫人金成郡君隴西李氏江夏王道宗之女也宜此象服爛其盈門嗣先姑之徽音立庶姬之範則薜華前落藁瘞城隅以證聖二年正月合葬於河南定鼎原禮也天使馬悲啟滕公之室人看鶴舞閉王母之墳松柏接於邛山邱陵對於伊闕石麟將鬪華表何年有子曰祖雍景龍初擢給事中兼侍御史內供奉追惟皇孝于奉親忠于事君恭于立身惠于臨人總是四行旁通具美貽厥孫謀以燕翼子故老之口旣絕竹帛之文又滅揚名兮奈何刊石兮來裔其詞曰

倬哉冉氏 世有仲弓 鐵冠繡服 給事于中

克昭遺懿 樹之家風 於皇嚴考 高明有融

德罔不尊	藝何不涉	嗣武先正	思文載協
建旗千里	逮君六葉	龜顧印房	虵盤綬篋
官以勤積	業因時峻	宰號神明	掾稱親信
驥足旣展	熊軒亦軻	邦國海康	京師河潤
出車西域	我君謀之	屯田北徼	我君護之
六軍有饋	其誰度之	一人無憂	其誰樂之
猛獸避德	均遷所莅	靈鳥依仁	霸昇執事
以今視古	名齊績類	天不愁遺	山頽北位
隴首迴望	秦川斷腸	吏人攀紉	哀雁隨喪
虛靈冀野	行臨帷堂	廟立邊郡	魂歸故鄉
王姬祔葬	禮之終也	水合蛟龍	墳同石馬

地積霜露 煙攢松檟 千載九原 高碑淚下

贈華州刺史楊君碑

公諱至誠字某^①農華陰人也厥初生人爲姬伯之祖
同邑命氏有楊侯之^②其後東陵奮而開國西漢盛而
移關門廬隱隱互連桃塞之上碑闕崑崙蔽滿華山之
下明德之後世有人焉大王父隋直閣將軍岷蔚撫毫
道五州刺史邢國公諱貴大父故右衛副率慈汾二州
刺史靜公諱譽考故常州刺史工部侍郎鴻臚卿金紫
光祿大夫散騎常侍太子少師贈儀同三司上柱國鄭
國懿公諱崇敬若夫家聲代業累德積仁故以克隆前
統光啟來葉矣公稟純嘏之粹靈漸軌物之名教端操

以正己崇讓以與人勵精以探道善問以毓德學無不
達藝無不周成童有傾矚之望旣冠爲宗匠之表年十
三調太常挽郎尋補潞王典籤大夫門子執紼橋山王
國詞人曳裾睢苑皆一時之選也顯慶中詔郡國舉賢
良公對策天朝無能出其右者遷太子通事舍人再舉
高第徙國子監丞坊監清流才地兼擇東朝束帶銀榜
增華西序影纓環林益潤高宗接千歲之統嗣百王之
業封岱岳禪云亭稽於舊章俟茲通博乃除公禮部員
外郎祀事克明大典攸序建邦分職得人者昌吏曹居
六官之首求郎盡一臺之妙又轉公吏部員外郎準的
文昌羽儀丹地丁太夫人憂去職公至行純篤幾於滅

性雖杖經外除而柴瘠加等門人記其喪禮天子憂其死孝服畢授幽州三水令曳尙方之舄鳴單父之琴志道不矜其大才勤政無陋其小邑美聲流於幽籥惠化而於周原又應文擅詞場舉策試天下第一敷陳聖謨啟沃明主究天人之際建皇道之極如有用我者其爲東周乎朝廷納賈生之言排汲直於外拜公隴州司馬未及赴官遘疾卒於長安第春秋若干王祥未施於邦正陳寔近終於邑長位不充德其如命何神龍初中宗克復丕業格于文祖迺睠從臣緬懷先正以公二子在章綬之列追贈公使持節太州諸軍事太州刺史非夫立言不朽陰德陽報安有藐諸孤而隆家旣沒世而榮

號哉夫人天水趙氏殿中監武強公某之女也受訓公
 宮作合君子言容賁於國史德行循於法度六姻之內
 宗焉始有輔佐之力卒延門戶之寄初公之捐館也九
 子呱呱哀衰喪位賴夫人是顧是復日就月將徙宅依
 仁闔門成訓三十年內八子登朝廷競虎綬之華門接
 魚軒之軫某年月封梁國太夫人景龍二年五月七
 日終於長安之延壽里間者遭家遷播几筵靡託而今
 蒙國昭洗情禮獲申以先天元年十月二十五日合葬
 於少陵原禮也第二第三子夫人在堂而沒長子第八
 子在殯而亡今並列於塋兆用嘉魂魄長子故兵部郎
 中徵中子前武衛將軍泚承懷徽烈思勒銘頌郎中昔

嘗緒言意感延州之許將軍今復哀託情深舊館之悲
高跡難名短詞莫逮采諸故老恭存梗槩其詞曰

昂昂楊君 秉心泉懿 大河靈岳 含光毓粹

學妙妍精 文道逸思 行爲時範 言爲故事

存蘊令德 沒揚虛位 善慶克家 哀榮乃備

嗣姑稱姒 敬妻曰冀 復有母儀 千載一致

貞墳七壟 同封此地 芳烈悠哉 金生碑字

贈廣州大都督馮府君神道碑

夫積德垂裕之謂仁追遠揚名之謂孝仁則慶鍾厥後
孝則榮及其親嘗三復於斯言今於馮府君見之矣府
君諱君衝其先長樂人也釋趙歸秦本家上黨分燕徙

越又據高良自遠祖榮懷化侯業以至于大父贈荊州都督益先考高州使君智歿咸以勳績建旗本郡甲兵雄於一方政化達於千里君蘊含^①光大之德守沖默安貞之志秉難進易退之操詣希聲若訥之道爲而不有故物譽難得而稱靜以居常故世榮無由而及以聖^②之歲終于本城子幼家艱喪禮蓋闕夫人麥氏備母師之六行履先姑之四德處順思柔以成婦道及衛亡共伯而魯重敬姜誓以汎舟之詩遵其闔門之禮季子今冠軍大將軍右監門衛大將軍上柱國渤海郡開國公力士始自齟齬來儀上京旣違徙宅之歡爰從倍年之訓感三州之深義易百代之因生捨馮亭之本枝從